



**UDRUŽENJE GRAĐANA ZA POVRAT STARE
DEVIZNE ŠTEDNJE U BiH i DIJASPORI**

RAIFFEISEN BANKA
ž.r. 1610450036820073
e-mail: nnisic@spinter.net
www.starastednjabh.org

Sjedište: Banja Luka 78000
I. G. Kovačića 139b
tel. 051/380-738
fax. 051/381-374

UPRAVNI ODBOR

Broj: 1494/09

Banja Luka, 26.04.2009.

**PARLAMENTARNA SKUPŠTINA
BOSNE I HERCEGOVINE**

Poslaniku u Predstavničkom domu - svima od 1 do 42

Delegatu u Domu naroda - svima od 1 do 15

Predmet: Osvrt na Izvještaj Privremene zajedničke komisije za utvrđivanje stare devizne štednje građana BiH položene na račune domicilnih banaka i podružnica u BiH

Poštovana gospodo,

Komentare na Izvještaj Privremene zajedničke istražne komisije koje Vam dostavljamo smo nazvali "Osvrt", a ne analiza iz samo jednog razloga. Analizirati se može samo ozbiljan dokument, a to ovaj izvještaj bez dileme nije. Iskreno govoreći, pred Istražnu komisiju su i postavljeni zadaci, tako da je i laiku odmah bilo jasno da ona na najveći dio zadatka ne može odgovoriti. Naša iskustva u radu sa Istražnom komisijom upućuju na zaključak da je glavni motiv za predlaganje formiranja Istražne komisije bio da se članovima komisije obezbjedi dodatak na platu u što dužem periodu, a ne želja ili namjera da se stvarno "nešto utvrdi" ili "predlože mjere". Članovi Istražne komisije su duže od godine dana primali po 500 KM uz platu. Samo za naknade članova Istražne komisije i sekretara je potrošeno preko 40.000,00 KM. Troškovi dolaska na sjednice, dnevnice i slično su bili približno još toliki i nimalo ne čudi da se uglavnom izvještaji istražnih komisija u ovakvim uslovima završavaju prijedlozima da se i dalje nešto istražuje ili ponovo formira kakva privremena komisija i tako u krug. Podsjećamo da je slična Istražna komisija u prošlom sazivu istraživala skoro potpuno istu problematiku i 13.9.2006. podnijela izvještaj. Vlasnicima stare devizne štednje nije bilo ništa bolje ni nakon izvještaja one, kao što neće biti ni nakon izvještaja ove Istražne komisije. Bolje je jedino bilo samo članovima Istražne komisije koji su inkasirali pojedinačno po više od 6.000,00 € (evra).

Od ovog vrćenja u krug vlasnicima stare devizne štednje je preostala samo nesvjestica, što apsolutno odgovara njihovoj ukupnoj situaciji, jer mnogi oskudjevaju i za ishranu i za liječenje.

Da su sredstva od 80.000,00 KM potrošena na rad tužilaca koji bi istražili isto pitanje, danas bi imali čistu situaciju i prepune zatvore kriminalaca koji danas uživaju u plodovima pljačke i kriminala kao "ugledni" građani, biznismeni, privrednici, ministri, predsjednici vlada i slično. Pravda je spora, ali je dostižna i zato će jednoga dana i Izvještaj Zajedničke privremene istražne komisije u najvećoj mjeri biti ocijenjen kao pokušaj prikrivanja zločina i zločinaca, što je svojevrsno saučesništvo u kriminalu.

Žalosno je što bar nekolicina parlamentaraca koji nisu uprljali ruke starom deviznom štednjom nisu odlučnije digli svoj glas i izborili se za korektnija, jasna rješenja, kao što je žalosno što se moralo potrošiti toliko vremena i novca da se zaključi da "verifikacija nije uspjela". Podsjećamo Vas da je Predstavnički dom Parlamentarne skupštine BiH 18.09.2006. godine bio usvojio Zakon o izmjenama i dopunama Zakona o izmirenju obaveza po osnovu računa stare devizne štednje i da su tada stvari bile postavljene na pravo mjesto. Nije bila predviđena verifikacija, nego spravljanje stanja. Obračun se trebao vršiti u evrima, a ne KM uz kamatu od 5% i naravno bilo je predviđeno skraćivanje roka za isplatu uz mogućnost da se starom deviznom štednjom može vršiti privatizacija i otkup državnog kapitala, stanova i poslovnih prostora, plaćanje građevinskog i poljoprivrednog zemljišta, plaćanje građevinskih dozvola i građevinskog materijala, plaćanje lijekova i troškova liječenja itd. U ove dvije rečenice se nalazi sve što je relevantno za rješavanje problema stare devizne štednje. To bi u velikoj mjeri iskorjenilo i kriminal i korupciju u ovoj oblasti, ali je to izgleda i osnovni razlog što se to ne čini. Jer, ako nema "verifikacije u KM" nema ni prodaje štednje, a ako nema prodaje štednje nećete je ni moći kupiti za 20 ili 30 % njene stvarne, nominalne vrijednosti. Osnovni izvor za sav kriminal je upravo konverzija deviza, devizne štednje u KM, za koju se bez ikakvog opravdanja koristi termin verifikacija. Cilj nije bio da se utvrdi koliko neko ima štednje, nego da se ta štednja pretvori u KM i da se vlasnici štednje odreknu ugovorenih kamata, pristanu na kamatu od 0,5% i odreknu se prava na sudsku zaštitu.

Veliki problem kreatorima ovakvog biznisa je Udruženje građana za povrat stare devizne štednje u BiH i dijaspori. Vjerovatno zbog toga se i u Izvještaju istražne komisije navode kojekakve gluposti vezane za Udruženje. Kao ima jako puno udruženja??? Udruženje nije htjelo saradivati??? Na svaki dokument koji je Udruženje dostavilo su se izjašnjavala ministarstva finansija i APIFOVI, a nisu istraženi materijalni dokazi o bezobzirnoj pljački učinjenoj od strane APIFOVA. Nije cijenjeno to što se asocijacija osiromašenih i opljačkanih nesretnika već više od 5 godina bori i nosi sa tri države, od kojih je jedna njihova država. Što je najgore, ta njihova država je veoma aktivna i ulaže velike napore kako bi pripadnici vlasti oni koje je ta vlast povlastila na patnji starih štediša zaradili i obogatili se. Te tri države su Bosna i Hercegovina, Srbija i Slovenija. Tragično je to što je ponašanje Bosne i Hercegovine prema njenim građanima inspirativno za Ljubljansku banku i Invest banku, odnosno njihove pravne sljednike i Sloveniju i Srbiju da se i one na isti način ponašaju prema njima, po sistemu, ako im ne da njihova država, ne damo im ni mi. Kada agenti njihove države mogu besomučno lagati na sudu u Strazburu, što ne bi i mi.

Udruženje, nikada nije dobilo ni jednu marku iz budžeta bilo kojeg nivoa vlasti, pa tako nisu pokriveni ni bilo kakvi putni troškovi ili dnevnice za one koji su dolazili na sjednice Istražne komisije. Isto tako je bilo i prilikom rada Radne grupe za izradu Zakona. Iako je bilo obećano nikada to nije realizovano.

No, bez obzira na svu drskost, Istražna komisija nije imala kuda. Ona je konstatovala činjenicu da je manje od 4% stare devizne štednje verifikovano. Ovo je

krunski dokaz o kakvom se zakonu u ovoj oblasti radi i kakvi su Vam i nam eksperti i stručnjaci koji su predlagali i kreirali zakon. Da je Bosna i Hercegovina demokratska i pravna država, svi koji su pjenili hvaleći ga morali bi podnijeti ostavke, ili bi bili smjenjeni. Možda će veće sankcije imati od strane kriminalnih gangova, onih kojima su obećali da će moći za male pare pokupovati više od tri milijarde maraka stare devizne štednje, a to se ipak nije desilo.

Prava istina je i to da je više od polovine onih koji su prevareni da verifikuju svoju deviznu štednju podnijeli zahtjeve da raskinu verifikaciju.

Poštovana gospodo,

Za rješavanje problema stare devizne štednje postoji rješenje i sigurni smo da ga znate, ako ništa naučili ste ga iz dopisa i istupa članova ovog Udruženja.

Nemate potrebe formirati bilo kakve komisije. Sve što vam treba tražite od Udruženja. Skolastička istraživanja radi dodatka uz platu možete obavljati u drugim oblastima.

Nema i neće biti riješeno pitanje stare devizne štednje bez učešća starih deviznih štediša.

S poštovanjem,

Za Upravni odbor
Predsjednik Svetozar Nišić



Dostavljeno:

1. Jose Manuel Barosso, the Presidency of the European Commission
2. Olly Ren, evropski komesar za proširenje,
3. Tary Daviss Generalni sekretar Savjeta Evrope;
4. Tomas Hamerberger, Komesar za ljudska prava pri Savjetu Evrope
5. Jan-Paul Costa, predsjednik Evropskog suda za ljudska prava
6. Savjetu miistara BiH;
7. Vladi Federacije BiH i Vladi RS;
8. OHR-u
9. Tužilaštvu BiH;
10. SIPA BiH - Sarajevo,
11. Medijima